

# 1 Timóteo

---

**1** <sup>1</sup>Natyo Paulo, Jesus Cristo niraene kakoare wiyasehareheta Enore xaokala xema, wavyahitere Wiyekohase Jesus Cristo xaokala xema hoka <sup>2</sup>naxairaty exa babera homana, Timóteo. Nityani hisaona Jesus Cristo koamaniya hisaohenere hiyeta. Maika Wexe Enore, Wiyekohase Jesus Cristo waiye moka hiso, airakoaneharetya hiso, exahe hoka himehexaikohare moka.

## Xairihalikisatinae Xaotyakisati Metalahare Xema Mawenatyakene Maheta

<sup>3</sup>Noxanihenere Macedônia koa nali xowaka naxa hiso hoka Éfeso nali hisaona naokita. Nali haiyaharenae iraiti hawarehare kakoa aotyakijita. Maika hirae ekakoaha hoka halakisaha haxaotyakiraha hatyohare kakoa. <sup>4</sup>Maika hirae ihiyeha hoka hatyo xakaihakeretere tahi, toahiyereharenae nexare xoaha tahi kaexaretyahitere halakisaha. Hatyoharenae hiyeta halitinae iraihekoatyahitataha. Nikare tyaanahitaha hoka maisa atyo Enore xahekola tyakekoti hiyeta waiyekehalakitere akereta xini. <sup>5</sup>Exe xaotyakisati atyo aeroretya maheta xawaiyityati waiyexe mahiyaseti akota tyoitere, tyakoiyahaliti waiyexeta tyoitere, tyakekoti aliterexeta tyoitere.

## Maika Xirihare Xaotyakisatiyenae Metalahare Kakoa

(*Romanos 16.17-18; 1 Tim. 4.1-3; 2 Pedro 2.1-19*)

<sup>6</sup>Haiyaharenae halakisa exeharenae hoka maisa xoare tyomare, iraehekoatyahitataha. <sup>7</sup>Kasani Enore Xaotyakiraho kakoa xakore aotyakisa aokowitaha hoka maisa waiyorexeha, maisa waiyekehalakere enomanaha, exahe iraetereha hatyakekoneha kakoa hoka maisa waiyekehalakere enomanaha. <sup>8</sup>Xaotyakiyaho atyo waiye, aokitere akeretayi atyo kaomaka hoka ehekore. Hatyohare waiyekehalakita womana. <sup>9</sup>Xaotyakiyaho atyo maisa haliti waiyexena anere xini. Xalijinihatexenai, iniyalahare nomaseharenae, masemaxemalaharenae, Enore maniya mawenaneharenae, maxaiminiraharenae, matyakekoneharenae anere atyo. Ajitere hanexe, hanityo, haliti fahrenae anere tehitiya. <sup>10</sup>Exahe hoka ohiroarexena, enatyalolona, haenane hatya kakoa ohiro akere tyaoiterena anere. Maoseratyalienae, iraesetatere harenae anere. Kirakahare betetyaka akere kolatayaha haliti hoka betetitere harenae anere. Emetalahare xakaitere, xoalinharettere iniyalahare

tyomahitere hoka Enore niraene mahokoanetitereharenae anere tehitiya atyo kaomaka.<sup>11</sup> Exe xaotyakisati atyo Iraiti Waiyexe isa nomani Enore hoka noxakai aohenere. Enore kinaterexe waiyexe nalitare.

### Ihalalahiliti Enore Xairakoaneharera Hiyeta

<sup>12</sup> Nihalahare Wiyekohase Jesus Cristo kakoa. Iyateliti isa nomani hoka notyomehenere nohateni hiyeta, exahe hoka tyakeko natyo hoka aoka natyo hoka nohateni notyomehenere hiyeta.

<sup>13</sup> Nikare tyoma, toahiya xakore iniyalahare niraeta etahi, iniyalahare namokitene xoaha hoka. Nokirawanetene harenae xakore hoka Enore airakoaneharetya natyo. Maisa notyakekorene hoka hatyo hiyeta maisa waiyekehalakere nomani notyomitereharenae.<sup>14</sup> Xakore hoka Wiyekohase kalore hawaiyexehare hiyeta, tyakekoti, xawaiyetyati isa nomani Jesus Cristo koamaniya nawenatyaka hiyeta.

<sup>15</sup> Exe xaotyakiye atyo aliterexe, hoka maika katyakekotyaka, kaxaokaka waiyexe xahekore kakoa: Jesus Cristo tyoa halitinae koni hoka iniyalahare nomaseharenae waiyexe maniya moheta maheta. Natyo ene atyo masakare iniyalahare nomasehare,<sup>16</sup> xakore hoka hatyo hiyeta Enore airakoaneharetya natyo, Jesus Cristo hamaholawakene nokakoi hotikisa maheta. Exehare atyo ite jikiniti tyakekohenerenae waiyehena hoka ihiyeta tyakekohena hoka wenati matyotenehare ite enawenaneha tyaona.

<sup>17</sup> Maika Xekohaseti matyotenehare, makamanehare, mawaiyakahare, haterore Enore kaxaiminisaka, exahe hoka kaihalaharetyaketa mene ekakoa naoka xoaha.

<sup>18</sup> Naokitere akereta hisaona naoka, haré Timóteo. Koxaka atyo toahiyita nikare kairaetyaka hitahi. Maika exe iraiti kakoa haiyateretyoa Xekohaseti koamaniya.<sup>19</sup> Maika heko hityakeko, waiye maniya taita hahekota. Haiyaharenae atyo maisa haxahekola waiyexe xema tyaonare hoka hatyo hiyeta ityakekoneha mawenekoarea.<sup>20</sup> Enekoniha Himeneu, Alexandre xoaha. Ahalakoahaliti niyatere ana nahalakisahene, kaxaotyakisaka hoka maisa Enore tahi iniyalahare iraehenahititha maheta.

### Xaotyakisati Iraexatyati Tahi

**2** <sup>1</sup> Exakere hotohare: Maika iraexatyati, xaxati harenae kaomaka ihalalahiliti Enore kakoa, tyotya halitinae tahi. <sup>2</sup> Maika kalorexenae xekohasetinae tahi xiraexatyta hoka waiyoreha maheta hoka waiye, wimehexaiko wisaona. Hoka tyotya xoalini hare Enore aokitere akere waiyexe taita wisoma. <sup>3</sup> Hatyo harenae atyo waiye. Enore waiyexe maniya mohetehenere wiso ana atyo hatyo harenae waiyeta.

<sup>4</sup> Kasani tyotyaha iniyalahare nonitata kaiyakehetaha hoka waiyexe maniya kaxomokahetaha hoka waiyexe, aliterexe waiyekehalaka enomanaha aokita. <sup>5</sup> Hiyaiya, haterore atyo Enore. Haterore haliti hoka Enore koamaniya mokita halitinae. Hatyo haliti atyo Cristo Jesus.

<sup>6</sup>Hatyota isoawi waini maheta hoka tyotya halitinae waiyexe maniya moheta maheta. Enore xaimenekola aoseta kaxekaka, hotikisa maheta Enore xahekola. Kasani tyotyaha waiyexe maniya tyaohetaha aokita hoka.

<sup>7</sup>Nokaxaxikatyaki iraiti kakoare hoka majudeuneharenae naotyakisa, hoka Iraiti Waiyexe, tyakekoti aliterexe hoka noxakai maheta. Maisa namaoseraita xini, aliterexe niraeta.

<sup>8</sup>Hiyeta hoka exakere kaomaka naoka: Maika wenakalati nihatyaka tyaoitionerae iraexahenaha Enore hiye hoka hakanonaeha ainakisaha iniyalahare hamaomaneharetaha, exahe hoka hamaxalijiniharenetaha.

<sup>9</sup>Maika ohironae tehitiya irihalo tyaona hoka waiye hamaxaokowihalotyoane kakoa kaimatyoaha hoka waiye ahekotyaha hawenaneha kakoa. Exahe hoka maisa masakare waiye tilikoaha harenae, maisa xoare maheta mokahitaha netati, pérola, ouro, exahe hoka imiti masakare karore ako hoka isoahitaha. <sup>10</sup>Waiyexe taitaiya tyomaha hoka katyakekotyakaha, aliterexe waiyexe xema tyaonhitaha nerekati maheta.

<sup>11</sup>Maika ohironae mema tyaonahme haxaiminiraha kakoa. <sup>12</sup>Kasani ohironae maisa enanae aotyakisa, wakatya hare naokare. Maika mema tyaonahme. <sup>13</sup>Hiyaiya, Adão hotohare kaomaka, hatyo najikinita Eva kaomaka. <sup>14</sup>Maisa Adão xini kamaoseratyaka. Hoka ohiro atyo kamaoseratyaka hoka maisa Enore aokitire akereta tyaoleta. <sup>15</sup>Xakore hoka ohiro ite xoima kaisanihena hoka iniyalahare nonita kaiyakeheta, hekoiya tyakeko, waiyexe maniya taita tyaoleta, irihalo tyaoleta, awaiyetita haiyanae hare hoka.

### Tyakekohatiyenae Kaxaikotyasenae (Tito 1.5-9)

**3** <sup>1</sup>Exe xaotyakiye aliterexe: Xala xamani tyakekohatiyenae kaxaikotyase tyaoña aokowita hoka haka aokowi waiyexe hateniti. <sup>2</sup>Maika exakerexe tyakekohatiyenae kaxaikotyase: haliti iniyalahare maomanehare waiyexe, hatita yanityore, maxaokowiharetyoanehare, waiye kaxaikoawitere, waiyore aotyakijitere, maxeharenehare, haliti kaokehena hoka waiye mokiterehare. <sup>3</sup>Kawexere maeranehare, maxalijiniharenehare, waiye iraeterehare, mehexaiko tyaoñitere, xiye haliti kalore haomana maxaokalahare, olo kalore maxaokalahare. <sup>4</sup>Waiye haisani, haiyanityo xoaha kakoa tyaoñitere, exahe hoka ityaninae tyakekotene haxaiminiraha kakoa. <sup>5</sup>Hiyaiya, xala xamaniya maisa haiyanityo, haisani hekoti waiyore kaxaikore, hoka aliyakereya tyakekohatiyenae kaxaikohená? <sup>6</sup>Waitare Cristo koamaniya tyaoheneruya maisa aliyakere tyakekohatiyenae kaxaikotyase tyaoleta. Waiya aokowiharetyo hoka Tihanare akereta kamatyakekotyaka. <sup>7</sup>Exahe hoka matyakekoneharenae aiminisene, waiya aliya hoka kamatyakekotyaka hoka kairaharetyaka hoka Tihanare maoserala xema tyaoña.

### Tyakekohatiyenae Kahinaetyasenae

<sup>8</sup>Nikare tehitiya tyakekohatiyenae kahinaetyaseharenae hoka waiye, mamaoseralahareha. Maisa kaloxa vinhoa terahitaha, exahe hoka xiyealiti, olo hare maisa kahare aokahitaha haomanaha. <sup>9</sup>Hekoiya waiye ahekotyaha, exahe hatyakekoneha xema taita tyaconaha. <sup>10</sup>Maika kahasakaharetyakaha hotohare. Hatyo kakoaiya jiyaha hoka tyakekohatiyenae kahinaetyase tyaconaha.

### Ohironai Nawenane Waiyexe

(*Tito 2.3-5; 1 Pedro 3.1-6*)

<sup>11</sup>Tyakekohatiyenae kahinaetyase exanityo tehitiyaiya waiyexehalo, maisa iraesexe. Maxaokowihalotyoanehalo, waiyexehalozi tyotya xoalini hare hiye.

<sup>12</sup>Tyakekohatiyenae kahinaetyasehareya atyo hatita yanityore, waiye kaxaiko haisaninae, haiyanityo hare. <sup>13</sup>Hatyohare hahatene waiye tyomahitereharenae atyo katyakekotyakita hoka waiyore mamairanehare irae ahitaha Jesus Cristo hatyakekoneha tahi.

### Kalore Metaharexe

<sup>14</sup>Exeharenae naxairaita homana, hoka kasani haxeroreta notyoa nowaiyeheta hiso naokowita. <sup>15</sup>Nohowitihareya hoka exe babera hiyeta waiyekehalaka homana Enore hanako wawenane tahi. (Tyakekohatiyenae xaokaka Enore hana nita.) Hatyo atyo Enore makamanehare hana.

Tyakekohatiyenae atyo aiyatelikijita Iraiti Waiyexe.

<sup>16</sup>Alitere atyo Enore xaotyakiraho maisa mahowitzihare xini:

Kaotyaka haliti akereta, Enore Nisekhore atyo haliti waiyexe aokene.

Anjonae hoka waiyene. Kaxakaisaka etahi haliti hotyalinae koni hoka kahare tyakekoahene. Exahe hoka kakolatyaka enokoa xeta.

### Xaotyakisatiye Metalaharenae

(*1 Tim. 1.6-7; 2 Pedro 2.1-19; Judas 4-19*)

**4** <sup>1</sup>Enore Nisekhore waiyekehalaka irae: Miyanitiye xowakehena ite hoka haiyaharenae halakisa hatyakekone. Hoka isekohaliti maoseratyaliyenae ite tyakekohenaha, exahe ite Tihanare xaotyakira hoka tyakekohenaha. <sup>2</sup>Exe xaotyakiye atyo matyakekoneharenae, maoseratyaliyenae ta tyoita. Exahkolaha atyo ekamane akereta. Motya kamatiherahi watyahiro keralihenahenene hoka maisa kehexene akereta atyo. <sup>3</sup>Exe halitinae atyo aotyakisahitaha hoka mahokoanetyahitaha wenakakoati, exahe haiyaharenae nakairati manakairatyakene aokahitaha. Xakore hoka Enore atyo exe kakanakairatyakere tyoma kakanakairatyaka maheta tyakekoterenena, iraiti waiyexe xema tyaconiterenae hiyeta. Maika xikanakairehenere nahitita xiraexaty xihalaharene kakoa. <sup>4</sup>Hiyaiya, tyotya Enore tyomehenerenae atyo waiyexe taita. Hiyeta hoka maisaiya aliyakere maxawaiyetyakita. Maika iraexatyati ihalahaliniti

kakoa kaxaokaka tyotya  
 hatyoharenae. <sup>5</sup>Hiyaiya,  
 Enore niraene, iraexatyati  
 xoaha hiyeta tyotya  
 hatyoharenae waiye kaokita  
 Enore ana.

**Waiyexe Jesus Cristo  
 Wakanehare**

<sup>6</sup>Exe kakoaiya  
 haotyakisa wihinaeharenae  
 tyakekohatiyenae hoka  
 Jesus Cristo wakanehare  
 waiyexe hisaona,  
 haotyakisahene iraiti  
 waiyexe, tyakekoti  
 xema hisaonitere kakoa  
 hoka. <sup>7</sup>Awa atyo haiyaharenae xakaihakatyahitatere ewaxirahare,  
 hatyaharetere xema hisaona. Cristo koamaniya hawenane kakoa  
 haiyateretyoa hoka kekoare. Heko hahasakoawi Cristo koamaniya  
 hawenane kakoa. <sup>8</sup>Haiyanae hasakoawiti atyo alitere waiye xakore  
 hoka Enore koamaniya hasakoawisaka atyo masakere waiye. Hatyo  
 hiyeta atyo wenati waiyexe kaotyakita, kalikini exahe haxowaka  
 hoka. <sup>9</sup>Exe xaotyakiye atyo aliterexe, maika katyakekotyaka, exahe  
 kaxaokaka ihalalahaliniti kakoa. <sup>10</sup>Hiyeta hoka waiyateretyoa, wahakita  
 kahare. Enore xahita wavyahita. Hatyo atyo makamanehare, tyotya  
 halitinae niyasehareheta, tyakekohenerenae masakare waiyexe maniya  
 xomokasehareheta xoaha.



(1Timóteo 4.4)

**Xoimahalitinae Nawenane Waiyexe**

*(1 Tim. 6.11-12; 2 Tim. 2.22-26; Tito 2.6-8)*

<sup>11</sup>Exeharenae kakoa haotyakisa, hiyakai xoaha. “Exe hare xema xisaona”, hexa ihiyeha. <sup>12</sup>Awa atyo haiyanae matyakekohena hiso, hiyoimahalitini hiyeta. Xakore hoka maika hawenane waiyexe hahotikisa tyakekohatiyenae ana: iraiti, xawaiyetyati, tyakekoti, waiyexe wenati hiyeta. <sup>13</sup>Maika nokaokini kijiya hakaexaretya halitinae haotita Iraiti Waiyexe nanekoa kaxairatyakehenere hoka hiyakaihaktya Cristo koamaniya nawenatyaka akiti, exahe Cristo xaotyakira kakoa haotyakisa. <sup>14</sup>Awa himaotyane toahiya xowaka tyakekohatiyenae kaxaikotyenasenae mokaha hakaheha hiseri heno hoka iraexatyaha hitahi hoka iyateliti Enore isa homana hoka Xekohaseti ana hahaka maheta. <sup>15</sup>Maika hahekotya exeharenae hiye hoka hatyo xema maniya taita hisaohena hoka hawénane waiyexe kekoarene tyotya halitinae

waiya. <sup>16</sup>Hirihare hawénane kakoa exahe hiyaotyakira kakoa hoka. Heko nikare hisoma, nikareya hoka waiyexe maniya hamokoawi, exahe semiterenae hoka waiyexe maniya hamoka.

### Tyakekoterenae Xaiminisaka

**5** <sup>1</sup>Awa atyo inityohaliti hiwatyalihena hoka kinatyaxa hiraehena ekakoa. Hiraehena ekakoa hoka hexe kakoa hiraetere akereta hirae ekakoa. Nikare hiwatyalihena xoimahalitinae hoka haxenane, hiximarene kakoa hiraetere akereta hirae ekakoaha. <sup>2</sup>Inityohalotinae kakoa hiraehena hoka hityo kakoa hiraetere akereta hirae. Xoimahalotinae kakoa hiraehena hoka hahahalonae kakoa hiraetere akereta hirae, awa atyo iniyalahare hahekotya ekakoaha.

<sup>3</sup>Wainiyaneneronae mahinaehalohalonae hoka hakahinaetyahene. <sup>4</sup>Xakore hoka wainiyaneneronaiya atyo kaisaniye, kajiyetexe hoka hatyonaiya atyo kahinaetene. Irihareya kahinaetyahitaha hanityo, hasero xoaha hoka ehekoreya. Nikareya hoka bakahenahitaha hanexenaeha, hanityonaeha, hatyokoenaeha aenaehenaherene katyahe. Enore atyo awaiyetita hatyoharenae. <sup>5</sup>Wainiyaneneroiya hawawahalo kaiserehare tyaonitere atyo, maisa xala hare kahinaetyare hoka Enore kahinaerene atyahita, hoka iraexaita ferakoa, makiya xoaha Enore kahinaetene maheta. <sup>6</sup>Xakore hoka wainiyaneneroiya hakéhalahalone maniya taita tyaona hoka ekamane atyo tyaonita, kaseta xakore hoka.

<sup>7</sup>Timóteo, maika noxaotyakiri akereta hirae ihiyeha hoka waiyexe maniya taita tyaonaha hoka maisa xoare kaxawatyakita ehenoaha. <sup>8</sup>Hoka xala xamaniya maisa hahinaehare kahinaetita, exahe hanityo, hanexe hoka hatyo atyo matyakekoneta. Hatya matyakekonehare nawenane xahexe atyo tyaonita.

<sup>9</sup>Maika wainiyaneneronae nexalo kaxomokakitereko 60 wanonexe xahexenae nexalo, exahe hakirore kaiyanenehenolo nexalo taita kaxomokaka. <sup>10</sup>Xoalini hare waiyexe ohiro nómame kawaiyakitere, haisaninae waiye aenaehenere, Enore koamaniya tyaoniterenae kiji tihitire, hatya kaokehena hoka hahanako waiye mokitere, haiyanae ana xoalini hare howithiharetere hiye kahinaetitere, exahe tyotya xoalini hare waiyexe taita tyomitalohalo nexalo taita atyoite kaxomokaka baberane koa.

<sup>11</sup>Hoka awa atyo wainiyaneneronae xoimahalotitarerenae nexalo hamoka. Hiyaiya, haxahekola hiyetaiya kaiyanene aokowihena hoka halakisa Cristo koamaniya nawenatyaka. <sup>12</sup>Nikareya hoka maisa hetati iraetereha akereta tyomahitaha hoka maisaiya ehekoreta. <sup>13</sup>Exe tehitiya: Tyaonakoatyahitaha, tonakoatyahitaha hatinae nihatyaka, maisa xoare hekoti tyomareha. Iraesahitaha, haiyanae nawenane watyalyahitaha. Mairaetyakahare mahetare ene irai ahitaha.

<sup>14</sup>Hiyeta hoka kasani xoimahaloti wainiyaneneronae kaiyaneneheteta, kaisaniheta hoka kaxaiko haisaninae, exahe hahanaha hare naowita.

Nikareya hoka wahalakoaharenae maisa iniyalahare iraetaha witahi.

<sup>15</sup>Hiyaiya, koxaka haiyahalonae wainiyaneneronae halakisaha  
hatyakekoneha Cristo hoka Ahalakoahaliti koamaniya tyaanaha.

<sup>16</sup>Maika hatya tyakekohatiye hinaehalo wainiyanenero hoka  
kahinaetene. Awa atyo tyotya tyakekohatiyenae kahinaetyahene aoka,  
waiya aliya hoka howitihare enomanaha. Hawawahalonae tyaaniterenae  
atyo ite tyakekohatiyenae kahinaehena.

<sup>17</sup>Tyakekohatiyenae kaxaikotyase waiye hakiterenae atyo waiye  
kabakatyakita. Iraiti Waiyexe xakaiterenae, aotyakijiterenae terota atyo  
waiye kabakatyakita. <sup>18</sup>Hiyaiya, exakerexe atyo nexa Iraiti Waiyexe:

“Awa atyo bowi kanase xolatya, tyahakita trigo kase hoka”.

Nihitiya:

Hatenitiye hakita hoka waiye bakatyaka.

<sup>19</sup>Awa atyo kairaharetyakehena tyakekohatiyenae kaxaikotyase  
hoka kasemaxematyaka. Hoka hinama, hanamaiya atyo irae hoka  
katyakekotyaka. <sup>20</sup>Iniyalahare tyomehenerenae haotikatita hiwatayali  
hoka haiyanae tehitiya mairaha hoka maisa nikare tyomahita.

<sup>21</sup>Enore, Jesus Cristo, anjonae waiyexenae haotita heko niraeta: maika  
tyotya xoalini hare hisomehena hoka exe xaotyakisatinae hityakeko. Tyotya  
halitinae, exahe tyakekohatiyenae kaxaikotyase, exahe hihinaeharetere  
hoka hakakoa hamokahene. <sup>22</sup>Awa atyo hikaholawaka hikahe hiyomokala  
kakoa hatya seri heno Enore hatene haka maheta. Awa atyo haiyaharenae  
tyomehena iniyalahare hoka hakahinaetene. Waiye hikaxaikoawi.

<sup>23</sup>Awa atyo one taita hisera, vinhoxa tehitiya ininae hisera hoka  
hityako kawetere makaheheta. Hiyaiya, kahalikihena hihokakita.

<sup>24</sup>Haiyanae iniyalahare tyomehena hoka kawaiyakita rota, iniyalahare  
exomokakaha nahitita. Hoka haiyanae nómame iniyalahare atyo  
maisa haxerore kawaiyakere. <sup>25</sup>Nikare tehitiya xoalini hare waiyexe  
kaomakehena hoka kawaiyakita rota. Exahe hoka haiyanae atyo komita  
maisa waiye kasemakita xakore hoka maisaiya aliyakere kaxateroakisakita.

### Xekohasetinae, Hatenitiyenae (Efés. 6.5-9; Coloss. 3.22-4.1; Tito 2.9)

**6** <sup>1</sup>Wakaharenaeya waiye aiminisa haxekohasenaeha hoka maisa xala  
hare iniyalahare iraeta Enore tahi, exahe wiyaotyakira xoaha xaokaka  
hoka. <sup>2</sup>Maika wakaharenae xekohase tyakekohatiyenae tehitiya hoka aiminisa  
haxekohase. Hiyaiya, exekohasenai atyo Cristo koamaniya tyaaniterenae hoka  
waiye hakitere resebitita hoka ixiyakawala ihinaeharenaeha atyo.

### Xaotyakisati Metalahare, Aliterexe Xiyehaliti Xoaha

Maika exeharenae kakoa haotyakisahene: <sup>3</sup>Hoka hatyaiya hawarehare  
xaotyakiye kakoa aotyakijita, hoka maisa atyo Wiyekohase Jesus Cristo

niraene waiyexe tyakekore, exahe hoka maisa wiyaotyakira waiyexe akere xini aotyakijita hoka <sup>4</sup>hatyo haliti atyo ahinityare tyaonita, maisa xoare hare waiyorexe. Kinatyaxa irai aokowita halitinae kakoa xoalini hare tahi. Hatyohare hiyeta okoawahare kakoati, xalijini kakoati, maoseratya kakoati, matyakekone kakoati kaotyakita, <sup>5</sup>exahe iraesekakoati kahare. Nikare tyaoniterenai maisa waiye maniya ahekotyareha, maisa aliterexe xema tyaonareha. Exahekolaha hiye motya Iraiti Waiyexe hiyeta kalore kakaxiyeharetyakita, kakaoloxatyakita aokahitaha.

<sup>6</sup>Alitere atyo Enore koamaniya nawenatyaka hiyeta masakare waiye maniya kaxomokakita, xoare xamaniya wixiyehare hoka wihalahare ekakoa hoka. <sup>7</sup>Hetati wisaohenere xowaka xoare wakolatya? Maisa xoare! Wijikohenaita aliye wawanane hoka xoare wakolatya? Maisa xoare! <sup>8</sup>Hiyeta hoka wikanakairere, wikaimere hoka maika hatyo kakoa wihalahare. <sup>9</sup>Haiyaharenae kaoloxa, kaxiyehare tyaona aokowita hoka hatyo hiyeta kahasakaharetyakahitaha, kamaoserat�akahitaha. Exahe maisa waiye ahekotyahitaha hoka hatyoharenae hiyeta xamaikohaliti, mawenekoaretyati kaotyakita enomanaha. <sup>10</sup>Hiyaiya, olo kaxawaiyetyakitere hiyeta atyo tyotya xoalini hare iniyalahare kaotyakita. Haiyanae xiyejaliti harenae aokitere haomana hiyeta hatyakekone halakisaha hoka xamaikohaliti kalore kaoka enomanaha.

### Xairihalinikisati

(1 Tim. 4.11-16; 2 Tim. 2.22-26; Tito 2.6-8)

<sup>11</sup>Hoka hiso Enore koamaniya hisaonitere, maika hisekoahena hatyoharenae nonitata. Waiyexe maniya, mamaoseralahare maniya taita hisaona. Enore maniya taita hisaona. Exahe tyakekoti, xawaiityati, maxahenerahareti xema taita hisaona. Heko hisaona mene Xekohaseti koamaniya. <sup>12</sup>Maika waiye haiyateretyoa hityakekone kakoa hoka wenati matyotenehare ana hahikoa. Hatyohare ana atyo Enore aoka hiso kahare halitinae haoti hityakekone hahotikihenere xowaka.

<sup>13</sup>Kalikini Enore haotita, exahe Jesus Cristo haotita nawakatya hiso. Hiyaiya, Enore atyo wenati ijita tyotya halitinae ana. Jesus Cristo hoka waiye iraeta Pôncio Pilatos haotita. Exakere nawakatya hiso:

<sup>14</sup>Maika iraiti kaxekakehenere homana xema taita hisaona, Wiyekohase Jesus Cristo haikoahaneheta kijiya. <sup>15</sup>Enaose ferakenehena ite hoka kaotyakehena Enore xaokalita. Hatyo atyo kalorexenae Xekohase, xekohasetinae Xekohase. Hatyo atyo haterore kalorexe waiyexe. <sup>16</sup>Hatyo taita atyo makamanehare. Xaokanatyakalati tyaonitere nali atyo tyaonita, maisaiya xala hare xane kaokita ehaliya. Maisa xala hare waiyarene, maisaiya xala hare waiyitene. Maika kaxaiminisaka, kaihalaharetyaka mene ekakoa! Xoaha.

<sup>17</sup>Maika kaoloxerenaе hiye hirae hoka awa aokowiharetyoahenaha haoloxaha ali waikohekoa tyaonitere kakoa. Exahe hoka hatyo xema hawenane mokaha.

Hiyaiya, hatyoharenae atyo maisa wikinatere mokare. Maika Enore xahita kaisere atyahaha. Hiyaiya, hatyo atyo tyotya xoalini hare waiyexe ijita womana wihalaharene niyahare. <sup>18</sup>Hirae ekakoaha waiyexe tyomaha maheta hoka ihiyeta kahare xoalini hare kakoare waiyexe tyaonaha waiyexe tyomahitere hiyeta. Maika waiyexe haliti tyaonaha hoka haxiyeahreha hiyeta maxiyeahreharenae ana isaha. <sup>19</sup>Nikareya tyaonaha hoka enahetaha maniya atyo kahare xoalini hare waiyexe kaxomokakita. Nikareya tyaonaha hoka waiyexe wenati ana xane hikoaha.

<sup>20</sup>Timóteo, maika waiye hikaxaiko kaxekakehenere homana. Awa atyo hiraesekoatya, hatyoharenae atyo maisa waiyexe Enore ana. Exahe awa atyo haiyanae kakoa hiraesekoatya waiyoliniti aokahitere tahi. Hatyoharenae atyo ehaikoare. <sup>21</sup>Haiyanae waiyoliniti aokahitere kakoare aokowiyahitaha, hoka ihiyeta hatyakekoneha halakisa.

Maika Enore waiye kaxaiko xiso xityotya, eko xoaha.